

## Jeanroy

I

Farai un vers, pos mi somelh,  
e·m vauc e m'estauc al solelh.  
Domnas i a de mal conselh,  
e sai dir cals:  
cellas c'amor de cavalier  
tornon a mals.

II

Domna fai gran pechat mortal  
qe no ama cavalier leal;  
mas si es monges o clergal,  
non a raizo:  
per dreg la deuri' hom cremar  
ab un tezo.

III

En Alvernhe, part Lemozi,  
m'en aniey totz sols a tapi:  
trobei la moller d'en Guarí  
e d'en Bernart;  
saluderon mi simplamentz  
per sant Launart.

IV

La una·m diz en son latin:  
"E Dieus vos salf, don pelerin:  
Mout mi semblatz de bel aizin,  
mon escient;  
mas trop vezem anar pel mon  
de folla gent."

V

Ar auzires qu'ai respondut;  
anc no li diz ni bat ni but,  
ni fer ni fust no ai mentaugut,  
mas sol aitan:  
"Babariol, babariol,  
Babarian."

VI

So diz n'Agnes a n'Ermessen:

"Trobat avem que anam queren.  
Sor, per amor Deu, l'alberguem,  
qe ben es mutz,  
e ja per lui nostre conselh  
non er saubutz."

## VII

La una·m pres sotz son mantel,  
menet m'en sa cambra, al fornel.  
Sapchatz qu'a mi fo bon e bel,  
e·l focs fo bos,  
et eu calfei me volentiers  
als gros carbos.

## VIII

A manjar mi deron capos,  
e sapchatz ac i mais de dos,  
e no·i ac cog ni cogastros,  
mas sol nos tres,  
e·l pans fo blancs e·l vins fo bos  
e·l pebr' espes.

## IX

"Sor, aquest hom es enginhos,  
e laissa lo parlar per nos:  
nos aportem nostre gat ros  
de mantenent,  
qe·l fara parlar az estros,  
si de re·nz ment."

## X

N'Agnes anet per l'enujos,  
e fo granz et ag loncz guinhos;  
et eu, can lo vi entre nos,  
aig n'espavent,  
q'a pauc non perdei la valor  
e l'ardiment.

## XI

Quant aguem begut e manjat,  
eu mi despoillei a lor grat.  
Destras m'aporteron lo gat  
mal e felon;  
la una·l tira del costat  
tro al tallon.

## XII

Per la coa de mantenent  
tira·l gat et el escoissen:  
plajas mi feron mais de cen  
aqella ves;  
mas eu no·m mogra ges enguers,

qui m'ausizes.

### XIII

"Sor, diz n'Agnes a n'Ermessen,  
mutz es, qe ben es conoissen;  
sor, del banh nos appareillem  
e del sojorn."  
Ueut jorns ez encar mais estei  
en aquel forn.

### XIV

Tant las fotei com auzirets:  
cen e quatre vint et ueit vetz,  
q'a pauc no·i rompei mos coretz  
e mos arnes;  
e no·us puesc dir lo malaveg,  
tan gran m'en pres.

### XV

Ges no·us sai dir lo malaveg,  
tan gran m'en pres.

- letto 925 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/jeanroy>